

Aam ro Paulus Ykom tna Tiim Mamo't *Jemaat* ro Galatia

Paulus ymah meen k'raa Kristen ro mhau mam provinsi ro Galatia

¹ Aam refo fo mbam k'jõ, Paulus. Jõ fi raabis ro Yesus *Kristus* ysya Allah. Yesus *Kristus* tiwya yajat menohé Yaja Allah yno re Ait yrok yasen. Ana mbewok oh mi mbis jõ tamo tkyas watum refo. Raa ro tabam refo aro mbis jõ fee.

² Jõ tsya raa makin ro kro *Kristus* nmah meen tna tiim aam refo k'anu, *jemaat* makin ro nhau mam *provinsi* ro Galatia.

³ Amu skabuk Bja Allah, re Ait ysya *Tuhan* Yesus *Kristus* matmof anu tna mno re anu nhau nhaf tnok ye.

⁴ Tiwya *Kristus* ymat iro wanu tibyo yoo yetsu rAit ysan yawe raa mame Ait yajat. Reto oh mi Ait yake safo wanu. Mfo wefo fo arin mkair toni: Raa ro wase Ait to ja mno-na bo sai. Arin mkair tibyo Bja Allah yawe *Kristus* yama yoo riof yee k'anu.

⁵ Nma, anu bbaut Bja Allah mammo snok mam hame wajin. *Amin*: Mabo oh!

Bokyas Moof ro Kristus to sau aran sai. Iso roto aro fee

⁶ Taja, tme, tao, tano na; anu fo tna sai kro *Kristus*. Allah ytu anu mkah boatmof ro *Kristus* yawe anu nmo raa wAit. Menohé mfo refo

jõ tari he anu nri bokyas roto sau. Ayoh ee! Anu haberek kbor k'Allah! Tna jõe waa: Anu nri bokyas reto mfi Bokyas ro Moof (*Injil*) meto. Ebokfi bokyas reto bokyas ro sre meto.

⁷ Bokyas ro anu nri reto to, mnan si Bokyas Moof ro *Kristus* meto fee! Raa mkbair sau mama mkyas bokyas roto reto k'anu. Ana mama ksoh mno re anu nantutu. Tibyo anu nnaut mamome tna wase bokyas ro ati to miyo! Bo ro ana mkyas reto to, miwer Bokyas Moof ro *Kristus*. Ana mkyas bo ro mabo fee.

⁸ Jõe tawe k'anu tawe, "Mfi raa sait yama yo k'anu tna ykyas bokyas roto k'anu yawe, 'Bokyas ajõe refo to Bokyas Moof ro Yesus!' Nri ait ma!" Mfi bo meen amu nesait soh mfe, *malaikat* ro mbam sawro ro Allah mama mkyas bokyas roto, nri bo k'ana weto ma! Awya sai ro ykyas bo sre tait, kbe Allah yno ayoh mroh k'ait!

⁹ Tna bo ro riwai reto to, jõe tawe te tkyas u k'anu tawe, "Mfi bo raa awya sai ykyas bokyas roto k'anu tna yawe, 'Bokyas ajõe refo Bokyas Moof ro Yesus!' Nri ait ma! Mfi bokyas rait reto miwer Bokyas ro Yesus tiwya anu smot meto; meen Allah yno ayoh mroh k'ait!"

¹⁰ Jõe tkyas bo mabo sai tna raa taro hawe jõe. Anu nnaut fyi? Jõe tno bo re kbe raa mhaf mnan jõe to fe mfe a? Mfe, jõe tno bo ro moof re kbe Allah yhaf mnan jõe. Mfi bo jõe tkyas bo tna tno bo afo re raa mhaf mnan jõe to, soh tno feto jõe tnan sryan ro tno bo ro mfi raabis ro *Kristus* rAit to fee.

Paulus yamo raabis ro Allah to, yari bo ro Allah yesait ybis ait

¹¹ Taja, tme, tao, tano na; nhar oh, nnaut oh: Bokyas ro *Kristus* tiwya tkyas k'anu to, mbam raa ro tabam refo meto fee.

¹² Bokyas reto raa ro tabam refo mkyas k'jõ tinyi fee. Mama mbam *guru* aro fee ye. Menohe *Yesus Kristus* oh mi yasbrah Bokyas reto k'jõ to.

¹³⁻¹⁴ Tiwya weto to, tmat bokom raa ro *agama* Yahudi to kaket. Bo mafa msya bosmot weto to, amu hohos na wamu tiwya mbo mno ye. Tna jõ mur-mur kro bo mafa wana miwer tafoh wojõ na. Tna jõ somya *agama* reto mamõ renti ye.* Feto to jõ safo toni saka raa ro kro *Kristus*. Anu nri bo ro jõ tno oh: Tiwya jõ simoyot raa ro kro *Kristus*. Tna jõ siko tawe tno *jemaat* ro Allah safe mkak.

¹⁵ Menohe tiwya wore jõ thau mam tme mhaf fares to, Allah ysok jõ oh. Tamo snok tanes tna wase tawe *Yesus* tait Ku ro Allah yare metait fefares. Tna mam ati ro Allah ksoh to, Ait yatmof jõ, ytu jõ tna yawe tamo tkyas Bokyas Moof ro

* **1:13-14** Raa mkyas 'Yahudi' to maja rau trion ewok: Ro sau to, mkyas raa mana sau. Ana oh mi kube ro bi Abraham, Ishak msya Yakub. Tiwya tinyi ana weto ja mkyas mai ro Ibrani. Tna raa mtu ana mawe 'raa ro Israel' ye. Ro ewok to, mkyas *agama* rana. Ana weto ja kro Watum ro Allah tiwya yoo yee k'Musa. Paulus tait tiwya kro *agama* Yahudi. Reto oh mi tiwya ait yari Watum ro Musa weto to, siko ybo yno beta. Menohe Paulus yamo raa ro kro *Kristus*. Tna yhar yawe raa mari Watum ro Musa msya bo mafa raa ro Yahudi roto taro to, bo ro ati fee. Watum reto kbe misohiranya rana msya Allah fee. Ait fi raa mana ro Yahudi fares. Menohe kro *agama* reto u fee. Mamõ snok mfo refo to, raa mana ro Yahudi mawat mhau fares mam rabin ro Palestina tna mam oo roto taro mam tabam refo ye. Tna ana mawat kro Watum ro Musa fares, tna taro kro *Kristus*.

Yesus.

¹⁶ Yatmof jō, tna yasbrah Ku rAit k'jō re kbe jō thar he Yesus yamo *Mesias* ranu. Thar tawe Ait oh mi Raa ro Allah ysok yamo raa sotak ranu. Allah yasbrah Ku rAit k'jō afo re tasen tamo tkyas Ait yasom. Raa mana ro Yahudi to, tkyas Ait yasom k'ana fee. Tkyas Ait k'raa ro mbam raa mana roto makin. Tamo tkyas k'ana tawe, "Yesus tait Ku ro Allah yare." Ati reto to, jō tasen tamo fooh ttu bo k'raa ro tabam refo wia fee.

¹⁷ Tamo't Yerusalem to k'raabis (*rasul*) roto taro fee ye. Ana mammo raabis ro *Kristus* wia matim tna mhar bo oh, menohe jō tamo ttu bo k'ana wia fee. Jō tasen tamo to k'raa ro mhau mam oo ro Arab wia tna hah te tamo't *kota* ro Damsyik u.

¹⁸ *Tahun* trion tuuf firwas tna tasen tamo't Yerusalem. Jō tamo hre su tsya Kefas (Petrus)† tna tsya ait thau ti trion 15 bo fetu.

¹⁹ Thau mam tno to, jō fri *Tuhan* Yesus yao Yakobus ye. Menohe jō fri raabis roto aro fee. Fri ana mbewok aran sai.

²⁰ (Bawya ro jō tkom k'anu refo to mabo tu oh. Allah yhar yawe jō sioh anu fee.)

²¹ Tna tbam Yerusalem jō tasen tamo't *provinsi* ro Siria msya *provinsi* ro Kilikia.

²² Ati weto to, raa *jemaat* ro kro *Kristus* mam *provinsi* ro Yudea to, ana mmat jō mkah masu fefares.

²³ Ana mari raa mkyas jō sai mawe, "Paulus ro tiwya simoyot raa ro kro *Kristus* to, mfo yesait smot *Kristus* tna ykyas yasom rAit k'raa."

† **1:18** Ati weto to, raa mawat masom Petrus. Fetu to ja raa mtu bi ait refi yasom Kefas ye.

²⁴ Ana to mari bo jō tashana smot Yesus feto tibyo mbaut Allah.

2

Paulus yamo't Yerusalem tna hre su ysya raabis sor

¹ *Tahun* trion 14 firwas tna jō thah te tamo't Yerusalem. Tamo tsya Barnabas tna tmen Titus ye.

² Allah yasbrah bo k'jō, ybis jō tasen tamo't Yerusalem. Jō tamo't Yerusalem tna tamo siret su tsya raa manes ro kro *Kristus*.^{*} Jō hre su tsya ana tna betoo tawe, "Bokyas ro *Kristus* refo ja jō tamo tkyas k'raa mana roto makin. Raa mana ro Yahudi to, tkyas k'ana fee." Jō tkyas bo tsya raa manes weto mesait aran wia. Jō waa be kbe ana ro mase weto hafrah tna hawe bo raa mkyas Bokyas ro *Kristus* k'raa mana roto. Tno feto be kbe raa mnaut mawe watum ro tkyas k'raa mana roto reto to mafer marak.

³ He mfe; raa manes weto mhaf mnan bo ro ja tamo tkyas k'raa mana roto makin reto. Raa manes weto to mbam raa mana ro Yahudi. Tna Titus tait ybam raa mana ro Yunani. Menohe ana mmat ait tna mbis ait raa mkom tohmi (*sunat*) to fee. Bo mafa rana raa ro Yahudi sai aran meto.

⁴ Tiwya raa mkbair roto taro mawe wa bokyas ajō. Tna ana mawe mbis Titus ykom tohmi. Raa

^{*} **2:2** Ana weto to, mbam raa mana ro Yahudi. Tiwya ana kro Watum ro Musa mbo mno. Menohe mfo refo ana kro *Kristus* oh tna mamō aban mana *jemaat* ro Yerusalem.

mkbair reto sioh mawe ana kro *Kristus*, he mfe.† Ana weto baro ja mama wan-wan skabuk su msya amu. Ana mhar mawe ja amu kro bo mafa raa ro Yahudi fee. Tna re ana mama mmat tan amu. Ana mnaut mawe bko hawe sai, anu raa ro kro *Kristus* bbo Watum ro Musa tna bno bo mafa raa ro Yahudi beta ye. Menohe anu bhar bwe bo mafa weto to make anu u fee.

⁵ Feto to amu aro ja nri bo ro raa mkbair reto mawe kebet bo fee saut! Amu nros tu nkyas Bokyas Yesus ro ati. Amu nwe nkyas Bokyas reto k'anu raa ro kro *Kristus* mam *provinsi* ro Galatia. Amu nros ntaf afo re Bokyas ro ati mhau k'anu matak yum.

⁶ Tiwya, amu nbo tuuf nsen nmo't Yerusalem. Tna ati ro amu hre su nsya raa manes ro kro *Kristus* mam tno to, ana hre mari bo ro jō tkyas. Mari tna tgyōt bokyas roto aro fee. (Raa ro tabam refo mmat ana to, mawe ana raa manes. Menohe Allah ymat raa ro mase msya raa ro kinyah to, yawe mnan anya sai. Tna jō tnaut tawe fetu ye.)

⁷ Ana weto mawe tgyōt bokyas roto aro fee. Ana makit sau su mnaut mawe, "Bokyas ro Paulus refo mnan si. Amu nnaut nwe Allah ysok ait tna ybis ait yamo ykyas Bokyas ro Yesus k'raa ro wase *agama* Yahudi. Ait ysok Paulus refi mnan si tiwya ysok Petrus ye. Petrus tait, Allah ybis yamo ykyas Bokyas ro Yesus k'raa mana ro Yahudi."

† **2:4** Raa mkbair refo to hafrah bokyas ro Paulus. Ana mnaut mawe mfi bo raa mawe mamu mo k'Allah to, mako hawe sai, ana kro Watum ro Musa tna msya bo mafa raa ro Yahudi weto beta. Tibyo Watum ro Musa msya bo mafa raa ro Yahudi ja kro to, make ana matak fares.

⁸ Ae, Allah yoo yatak rAit yse k'Petrus yamo raabis rAit yamo yo k'raa mana ro Yahudi. Feto ye bi Ait oh mi yoo tak yse k'jō, yawe jō tamo to k'raa mana roto makin.

⁹ Tna ati reto to, Yakobus, Kefas (Petrus), msya Yohanes ana mawe, "Esre." Tna ana mfot matem msya jō tna msya Barnabas. Ana mabo tuuf reto to, mam aban mana mam *jemaat* ro Yerusalem. Ana weto mfot matem msya amu tna mawe, "Anu fo bkah bo mana sau su. Amu nhar nwe Allah yoo bouum yee k'anu mbewok, ybis anu nmo no k'raa mana roto makin, raa mana ro Yahudi fee. Tna ybis amu nmo no k'raa ro Yahudi."

¹⁰ Tis rau to ana msi bo k'amu mbewok mawe, "Sorni ma: Nmat tna natmof raa kinyah ye!" Tna jō ksoh tno bo reto ye. Tna amu mbewok nsen sikba Yerusalem tna nsen nmo bamu.

Paulus santri bo ysya Petrus mam Antiokhia

¹¹⁻¹³ Raa ro kro *Kristus* mbam raa mana roto to, tiwya Kefas (Petrus) ja hre yait bo su ysya ana. Tna yiranya ysya ana ye. Menohe ti baro firwas tna Yakobus yafoh wait baro mama snok mam *kota* ro Antiokhia. (Ana weto mbam raa mkbair ro ja mnaut mawe, "Raa beta ro kro *Kristus*, mako have sai, kbe ana kro bo mafa ranu, raa mana ro Yahudi to beta!") Tna Kefas (Petrus) tait waa ana. Tibyo yari tna kro bo ro ana mawe. Feto tna ait have bo yiranya ysya raa mana roto ro kro *Kristus* u. (Ait sesa ait feto to, ait yari Bokyas ro Yesus ybo yno fee.) Tna Barnabas ysya raa Yahudi ro kro *Kristus* beta to mmat bo ro Kefas (Petrus) yno. Tibyo ana mari bo mbam raa mkbair reto ye. Mari tibyo sesa

ana ye tna miranya msya raa mana roto ro kro *Kristus* u fee ye. Ana beta masen sioh ana sai oh meto. Feto to ati ro jō tmat Kefas (Petrus) to, jō bhah ait tawe, “Nyō sesa nyō to, nno bo ro mkair meto!”

¹⁴ Jō tmat he ana miwer Bokyas Yesus ro ati oh meto. Feto to wore wo raa *jemaat* ro Antiokhia beta sired su to, jō tawe Kefas (Petrus) tawe, “Fyi! Nyō fi raa mana ro Yahudi fe mfe a? Menohe anu smot *Kristus* tibyo nyō bitsre bo mafa raa ro Yahudi oh, tna nasen nno bo mnan raa mana roto sai. Nyō nno feto moof. bo mafa weto to, make nyō u fee. Menohe mfo refo nyō nbis raa Yahudi ro mfo refo kro *Kristus* oh, nawe ana miranya msya raa mana roto to ma. Nbis bo reto mkah bawya!”

¹⁵ Tna tawe k’Petrus tawe, “Nyō nsya jō fo, anu mbewok bbam biin raa mana ro Yahudi. Tibyo anu raa ro bhar Watum ro Musa nteet. Menohe raa ro mbam raa mana roto to, ana wase Watum reto. Feto to raa ro Yahudi, ja mnaut mawe raa mana roto weto beta to ‘raa ro mno iro’.

¹⁶ Menohe anu ro kro *Kristus* oh bhar bwe, ‘Watum reto mtai mno raa mhaf mato moof ati to fee.’ Allah ymat raa ro mari Watum ro Musa ja mbo mno to, tna yawe ana weto to, raa ro mhaf moof ati to fee. Awya ro smot *Kristus* Yesus oh mi Allah ymat tna yawe ana weto raa ro mhaf moof ati to. Watum ro Musa reto matak meto fee. Tiwya, ati ro anu brok bhar bwe bo reto mabo to, anu bashana tna smot *Kristus* Yesus. Tna anu bsen kro Ait oh.

¹⁷ Feto to, anu raa Yahudi bitsre Watum ro Musa. Anu ksoh bwe Allah ymat anu yawe anu

bhaf moof ati mfi raa ro wase mno iro. Feto to, anu bsen smot *Kristus* oh. Menohe raa ro Yahudi mmat he anu bitsre Watum ro Musa tibyo ana mkyas kair amu. Ana mawe, 'Aha! Paulus na mno iro meto! Ana mnan anya mfi raa ro mbam raa mana roto! *Kristus* yisti re ana mno iro!' He mfe: *Kristus* yisti re raa mno iro fee saut! Raa bitsre Watum ro Musa to iro meto fee.

¹⁸ Jõ fret bo tawe Watum ro Musa to mnan anya msya amah ro rabo. Tna jõ titrah amah reto oh. Fyi re jõ haberek tbo ara ro rabo reto tna sgi amah reto u? Mfi bo jõ te tisoj jõ thaf moof mkah bo haberek tna tari Watum ro Musa tbo tno u to, jõ tno iro oh meto.

¹⁹ Tiwya jõ thau tari Watum ro Musa to tbo tno. Menohe mfo refo jõ thar tawe Watum reto misoh irat ajõ tsya Allah moof to fee. Feto to jõ bitsre Watum reto afo re tno bo ro Allah yawe. Allah yawe jõ smot bo ro *Kristus* yno. Jõ smot tawe raa mame Ait yajat mam ara warok. Tibyo yisoh iranya ajõ tsya Allah.

²⁰ Thau mam tabam refo tesait thau kar fee. *Kristus* yamos rAit ysan k'jõ. Feto to thau tno bo kar u fee. *Kristus* yamos rAit mjin mam jõ thaf ajõ. Thau mam tabam refo fo, thau smot Ku ro Allah yare. Safo ajõ to Allah ymit Ku rAit *Kristus*. Feto oh mi *Kristus* yajat raa mame mam ara warok. Reto mnan bo jõ tesait tajat raa mame su tsya Ait ye. Au oh meto Allah ymat jõ to, yawe yoo riof yee k'jõ. Ku ro Allah yare tait yatmof jõ tna ysan yetsu rAit shauk jõ.

²¹ Jõ hawe bo haberek kro Watum ro Musa u. Maami jõ tiwana Allah boatmof rAit oh meto. Bo

ro Yesus yno oh mi Allah ymat jō tna yawe jō tfi raa ro mhaf moof ati. Watum ro Musa to matak re misoh jō thaf moof ati to fee. Mfi bo Watum reto matak mnan si maami tiwya *Kristus* ysan yetsu rAit fee!”

3

Allah yoo riof yee k'awya?

¹ Ayoh ee! Anu raa *jemaat* ro nhau mam Galatia fo, tnaut tawe raa sioh mno anu. Tibyo anu namboi tna nwe kro Watum ro Musa! Anu nno fyi sai meto ee? Tiwya tkyas Bokyas ro Yesus k'anu to. Tawe Yesus tait raa mame yajat oh. Tna jō betoo maja rau to kaket.

² Jō ttu bo sau k'anu tawe, “Tiwya anu nkai Har ro *Tuhan* to fyi? Anu kro Watum ro Musa tibyo nkai fe mfe a? Mfe, anu nri Bokyas ro Yesus tna smot (*percaya*) Bokyas reto nwe bo mabo. Tibyo nkai Har ro *Tuhan* fea!

³ Tinyi rau to, Har rAit misoh iranya ranu nsya Allah. Mkah bawya anu ne nwe anu nesait ntai ntak nisoh iranya ranu nsya Allah fetu! Mfo refo anu tomer nisoh iranya reto renti mamu snok tis rau to, mkah tak ranu nesait ai a? Anu wase bo toni sai meto a?

⁴ Tiwya anu smot Bokyas ro Yesus. Tna bosmot ranu reto mno re raa sikowah anu. Tna mfo refo anu ksuh nwe bitsre bosmot ranu tna mbeak makus fe mfe a?” Jō tinaut tawe anu nno fetu ma.

⁵ Tna te ttu bo k'anu u tawe, “Fyi re Allah ysan Har rAit k'anu to? Fyi re Allah yno bo ro hnah mam *jemaat* ranu to? Anu kro Watum ro Musa mi Ait yno meto, fe mfe a?” Mfe! Anu nri

Bokyas ro Yesus tna smot (*percaya*) nwe Bokyas reto mabo.

⁶ Nnaut Abraham: Tiwya tinyi ait yari bo ro Allah yawe tna smot (*percaya*). Smot yawe bo ro Allah yawe reto to meen mabo. Tna Bokom ro Allah mawe,

“Bo ro Allah ykyas k’Abraham reto to, ait yari tna smot (*percaya*). Smot yawe bo ro Allah yawe reto to meen mabo. Au oh mi Allah yawe Abraham tait raa ro yhaf moof ati.”

Kejadian 15:6

⁷ Feto to, nri oh, nhar oh: Raa ro smot Allah fetu, ana mnan fi ku ro Abraham yabe.

⁸ Bokom ro Allah tiwya mkyas raa ro mbam raa mana roto ye. Mawe ana ro smot Ait kbe Ait ymat ana mfi raa ro mhaf moof ati. Tna Allah ykyas Bokyas Moof reto matim wia tinyi wore bo wetu mabo fefares. Bokyas ro Moof (*Injil*) reto to, Allah ykyas k’Abraham matim wia. Yawe,

“Mkah nyõ to, meen Jõ tno bo ro moof k’raa mana roto makin.”

Kejadian 12:3

⁹ Feto to, anu bhar bwe raa ro mari tna smot Allah to, kbe Allah yno bo moof k’ana wetu. Yno bo moof k’ana mfi tiwya Ait yno bo moof k’Abraham wia.* Abraham tait, raa ro smot Allah. Bo ro Allah yawe to, ait ynaut mamome fee. Ja yari tna yawe bo mabo.

Watum ro Musa moo riof mee k’raa fee

* **3:9** Reto oh mi Allah ymat raa ro smot Ait to mawe ana mfi raa ro mhaf moof ati.

¹⁰ Raa taro mnaut sre mawe, “Amu ja nri Watum ro Musa, feto kbe meen amu nkai roon ro hame.” Menohe Bokom ro Allah mawe, “Raa ro beroh mari Watum ro Musa tna mbo mno bo weto beta to fee, meen ayoh mroh k’ana weto. Hawe sai kbe ana mbo mno maja beta renti.”

Ulangan 27:26

Awya ro mtai mno bo weto beta? Raa aro mtai mno feto fee. Raa matak mari tna mbo mno bo weto beta mnan si to fee. Feto kbe ayoh meen mroh k’ana weto beta.

¹¹ Bokom ro Allah mawe,

“Raa ro smot Jō oh mi raa ro mhaf moof ati to. Tibyo meen Allah yoo roon yee k’raa weto.”

Habakuk 2:4

Au oh mi Allah yawe Ait yoo roon yee k’raa ro smot Ait. Feto to anu bhar bwe, “Awya ro kro Watum ro Musa tibyo yawe Watum ro ait kro reto mno re yhaf rait moof ati to, ait yawe bo ro sre meto. Awya ro kro Watum reto menohe smot Allah to fee; sait bo yhaf moof ati to fee.”

¹² Ati ro Allah yoo Watum reto yee k’Musa to, Ait ykyas bo yawe bawya? Ykyas bosmot (*iman*) aro fee. Bokom ro Allah mawe,

“Kbe ayoh mroh k’awya sai ro ybo yno bo weto beta mnan si to fee.”

Imamat 18:5

Soh raa mawe mamoo raa ro mhaf moof mamoyot Watum ro Musa to, mako hawe sai kbe mari bo beta ro Watum reto msi k’ana mbo mno sau-sau mnan si.

¹³ Feto kbe meen ayoh mroh k’anu, raa beta, fe mfe a? Anu beta biwer Watum ro Musa oh.

Rau ro moof to, Allah kmo anu yno ayoh mroh k'anu beta. Oos maami *Kristus* yfes anu. Watum ro Musa mawe,

“Allah kmo yno ayoh mroh k'awya sai ro raa mame yajat mam ara warok.”

Ulangan 21:13

Kristus raa mame mam ara warok tibyo ayoh mroh k'Ait oh. Yno fetu mkah anu riryōn, afo re kbe ayoh mroh k'anu to fee. Ait yfes anu oh meto.

¹⁴ Tiwya Allah ysi bosu akus k'Abraham yawe yno bo ro moof k'ait ysya kube wait. Ti baro firwas tna Ait bitsre bosu reto k'anu, raa ro nbam raa mana roto ye. Au oh mi Allah yno re *Kristus* yfes anu. Anu smot *Kristus* Yesus tibyo Ait yno bo ro moof k'anu ye:† Ait yoo Har ro Allah to mhau matam anu ye. Ysan Har ro Allah k'anu mnan fi bo tiwya Ait yawe to ye.

¹⁵ Taja, tme, tao, tano na; mam tabam refo to, ati ro bi yabi sait yuumto bombra wait ku rait sait to, ja raa roto taro mari tna kro bo ro bi retait yawe. Bo ro ait yawe to, kbe mabo tu. Raa roto mno wa ku retait fee. Ait yesait oh mi krek waan ro yaja yuumto reto. Raa aro yirenti fee. Tna bo ro Allah yawe yuumto k'Abraham to mnan fetu ye. Ait yawe yum, kbe yno tu oh.

¹⁶ Allah yawe,

“Meen Jō tuumto bo k'Abraham kube wait sait.”

Kejadian 17:19

† **3:14** Bo moof ro Ait yno k'Abraham ysya anu to oh mefo: Yno re anu bfi raa ro mhaf moof ati. Ymat bosmot ranu tibyo yawe anu fo raa ro bhaf moof mnan si.

Bokom ro Allah far-far reto mkyas mawe yuumto bo kube ro Abraham 'magin' to fee. Menohe Bokom refo mkyas kube rait sait aran sai. Tna Ait retait oh mi *Kristus* to.

¹⁷ Nhar oh! Nnaut oh: Allah ykyas bo k'Abraham wia matim yawe kbe yuumto bo k'ait. Tna *tahun* trion 430 firwas tna Allah yoo Watum yee k'Musa. Tna bo ro tiwya Allah yawe yuumto k'Abraham to, yawe yum oh. Allah ynaut tna ybo fares. Watum ro Musa reto mno wa bo ro Allah yuumto k'Abraham to fee.

¹⁸ Allah yawe yuumto bo reto k'raa ro kro Watum ro Musa fe mfe a? Mfe. Tiwya yawe kbe yuumto bo reto k'Abraham ysya kube wait. Allah ysi bosu akus tna bo ro Ait yawe yno to, kbe ybo yno tu oh. Tna bosu reto oh mi Ait yatmof Abraham.‡

Allah yoo Watum yee k'Musa mkah bawya?

¹⁹ Soh Allah ksoh rAit sai mi Ait yuumto bo k'raa to, Ait yoo Watum yee k'Musa mkah bawya? Yoo afo re mbam Watum reto raa mrok mhar bo ro moof to miyo tna ro iro to miyo. Allah ksoh yawe raa kro Watum reto tibyo fee. Yawe raa kro Watum reto mamu snok ati ro Raa sait yama sai. Tiwya ati ro Allah ysi bo k'Abraham to, Ait ykyas kube ro Abraham sait. Ait retait oh mi *Kristus*.§ Tiwya Allah ybis *malaikat* wait moo Watum reto mamu mee

‡ **3:18** Anu ro smot *Kristus* tna bsam wai k'Ait to, bfi kube ro Abraham ye. Tibyo Allah ymat mees ro Yesu tna yawe anu bfi raa ro mhaf moof ati ye. § **3:19** Mbam far-far refo anu bhar bwe Allah ksoh yawe raa kro Watum ro Musa mamu snok *Kristus* yama yfes raa sai.

k'Musa. Tna Musa yros susai yoo Watum reto yamo yee k'raa ro Yahudi.

²⁰ Mfi bo raa mabo ewok santri bo to, ja raa sait yros susai ana mbewok weto. Raa retait yno re kbe ana mbewok mrok makit sau su to. Tiwya, ati ro Allah yoo Watum reto yee k'raa to, yno mnan feto ye: Musa yros susai ykyas bo ysa Allah tna ysa raa. Menohe tiwya Allah yesait aran ysi bosu reto k'Abraham. Ait yno bo reto ai. Ybis Abraham yno bo aro fee. Rau ro ati to, Abraham smot bo ro Allah yawe meen mabo. Ait ynaut bo reto maut-mroh to fee.

²¹ Tiwya Allah ysi bosu yawe yuumto riof k'anu raa. Fetu to fyi? Watum reto santri bo msya bosu reto fe mfe a? Mfe: Watum ro Musa matak re kbe mno anu bhaf moof to fee. Watum reto Allah yoo mkah yoo riof yee k'raa to fee. Mfi bo Watum reto matak re mno anu bhaf moof to, maami Allah yno sai ye mfi fetu.

²² Bokom ro Allah mawe raa beta mno iro. Menohe Allah ysi bosu k'anu, raa ro mno iro to, re kbe yyon iro wanu: Yawe raa beta ro smot Yesus *Kristus* tna msam wai k'Ait to, kbe Ait yyon iro wana tna ysan riof k'ana.

* **3:21** Tis rau to, Allah ksoh yawe raa mamu mhaf moof ati re kbe miranya msya Ait. Ait yoo Watum reto tna raa mrok mhar mawe ana mesait to raa ro mhaf mkair, mesait ai mamu raa ro mhaf moof ati to fee. Fetu to far-far refo mawe, "Watum reto santri bo msya bosu reto fee." Watum reto to bo ati re kbe raa mhar mawe ana raa ro ja mno iro, raa ro mhaf moof ati fee. Menohe Watum reto to iso ro raa mamu mhaf moof to fee. Anu smot bo ro *Kristus* yno bwe mabo oh. Bosmot (*iman*) fetu oh mi Allah ymat anu yawe anu bfi raa ro mhaf moof ati.

²³ Tiwya wore anu wase bo smot Yesus to, Watum ro Musa kmot anu. Kmot anu wa re kbe anu bno iro kbik-kbak to fee. Watum reto kmot anu wa mammo snok Allah yerif iso ro bosmot (*iman*) reto.

²⁴ Tiwya Watum ro Musa reto nnan mfi '*guru*' ro mber anu re bma bo *Kristus*. Afo re anu bsam wai k'Ait. Anu smot Yesus feto tna Allah ymat bosmot ranu reto tibyo yawe anu to bfi raa ro mhaf moof ati.

²⁵ Mfo wefo anu smot *Kristus*. Tna Watum ro Musa mammo *guru* ranu u fee.

²⁶⁻²⁷ Mfo refo fo anu smot *Kristus* Yesus tna nsam wai k'Ait. Tibyo anu nmo ku ro Allah wAit oh meto. Anu to, Allah *baptis* oh. Au oh mi Ait yawe anu nhaf sau su nsya *Kristus* to.

²⁸ Fetoto raa mbam raa mana ro Yahudi msya anu raa ro nbam raa mana roto makin ye, anu beta bmo bhaf sau, srau sau, bkit sau su bsya *Kristus* Yesus oh. Anu ro mammo sryan boh ye, raa ro ja mros kar tna mammo sryan fee ye, raa sme ye, msya fnya ye to: Anu beta bmo bhaf sau, srau sau, bkit sau su bsya *Kristus* Yesus oh. Tibyo Allah ymat anu yawe anu nnan anya sai.

²⁹ Tna soh anu beta smot *Kristus* oh to, anu fo nmo raa wAit. Anu beta to kube ro Abraham ye. Tibyo Allah ysi bosu yawe yuumto bouum k'anu wefo ye.

4

Watum ro Musa mbo anu u fee

¹ Bi ro krek waan sait yhai. Mfi bo yhai tna ku rait ro yabe sait to ykek fares to, bi roto sait kbe yayō ku retait ytos. Tna bi refi yoo waan ro yaja tii yhai to, yoo yse wia. Kbe ku retait yabi tna ye yrof yoo waan rait bi ait ro yse. Tii ykek fares ait ynan fi sryan boh: Bi retait ybis-baas ku retait, tna ait yse bo aro fee ye. Ebokmi bo wait to bo beta ro yaja tiwya krek ye. Ku retait yabi tna bi ait yoo waan rait yee. Tna yhar yawe bo wait.

² Wore ait ykek fares to, raa roto ytos ait. Tna bi retait ybo waan rait mamō snok mam ayō ro ku retait yanes oh, mnan tiwya yaja ysi oh.

³ Feto ye mnan amu raa ro *agama* Yahudi: Ati ro amu nkek fares mamō snok mam ayō ro tiwya Allah Bja ranu ysi oh to, amu nri Watum ro Musa tna nno bo mafa raa ro *agama* Yahudi fares. Bo ro tabam weto mbo anu matak fares. Bo ro tabam weto mbo amu mnan fi raa bobot sait ybo sryan boh wait.

⁴ Menohe oon sboh, tna Allah ybis Ku rAit yama. Fnya ro sai mabe Ait. Fnya ro mabe Ait ysya raa ro ytos Ait to, ana mbewok raa ro *agama* Yahudi. Tibyo Allah yno re Yesus tait raa ro yari Watum ro Musa ye.

⁵ Allah ybis Ku rAit yama re kbe yfes amu. Yama yfes amu, raa ro tiwya nri Watum ro Musa. Yfes amu raa re Allah yayō amu tibyo nmo ku wAit, tna kbe noo bo beta ro Ait ysan k'amu.

⁶ Tna anu nmo ku wAit ye. Tibyo Allah ybis Har ro Yesus mama mabum mam anu nhaf wanu ye. Har rAit mno re anu bkyas bo k'Allah mam bhaf mato wanu bwe, "*Abba*, Taja!" Tna anu bhafri bi Ait bnan fi Ku rAit Yesus yhafri Yaja

ye.

⁷ Feto to, anu sait-sait nnan fi sryan boh to u fee. Allah yno re anu nmo ku wAit oh. Tibyo anu krek waan ranu ro Allah yuumto k'anu oh.

Anu ne nno bo ro tiwya anu nno to mkah bawya?

⁸ Tiwya anu nhar Allah fefares to, anu nri tna kro bo ro tabam sor. Bo weto to nnan Allah fee. Bo weto matak fee ye.

⁹ Menohe mfo refo to anu nhar Allah to, Ait ro ati oh. (Rau ro ati to, Ait yhar anu ye!) Anu ne nri bo ro tabam refo to, nno fyi meto! bo mafa raa ro *agama* Yahudi msya Watum rana to mfi bo ro tabam sai. Bo weto to matak fee. Anu nri bo weto to mafer marak. Anu ksoh nwe bo weto mbo anu u to, nnaut nwe fyi meto!

¹⁰ Tna fo jō tari he anu nkyō bokyō ro *agama* Yahudi ye. Watum rana mkyas ayō aro rau-rau msya snyi msya *tahun* wore ana makyō korat wana. Tna mfo refo anu kro nkyō bokyō weto nnan ana ye. Anu nnaut nwe nno feto tibyo nisohiranya wanu nsya Allah oh meto. He mfe.

¹¹ Tiwya jō thau tsya anu to, jō hrowyō thai tkyas Bokyas Moof ro Yesus k'anu. Tna mfo refo to, jō tnaut yyi tawe hrowyō ajō reto mafer aro fe mfe a?

Tiwya anu biranya kaket

¹² Taja, tme, tao, tano na; tiwya jō bitsre Watum ro Musa tna jō tnan fi anu. Feto to jō soh-soh anu tawe, "Nitsre Watum reto tna nhau nnan fi jō ye." Tiwya jō thau tsya anu to, anu nno bo ro mkair mai k'jō fee.

13 Anu nhar nwe bo ro mno re jō tamo to k'anu to, jō kiyam. Ti reto to, jō kiyam tibyo jō tamo thau mam beto. Thau tsya anu tna tkyas Bokyas Moof ro Yesus (*Injil*) k'anu ye.

14 Tna kiyam ajō reto mno anu nsui. Menohe anu natmof jō, tna anu nashoho fee, anu nikyak jō fee ye. Menohe anu nisoh jō moof. Anu nitrah nhaf wanu k'jō mnan fi anu nmat *malaikat* ro mbam k'Allah. Anu nno bo moof k'jō mfi bo anu nmat *Kristus* Yesus yesait bo ye.

15 Mam ati reto anu nhaf mnan k'jō. Anu nmat jō to nhaf mbyō. Tna anu ksoh ntufrok nsu mauf wanu nhaut mam jō tasu ajō ro mkair. Menohe mfo refo simaut ranu reto miyo?

16 Mfo refo tkyas bo he anu nri fee sai. Bo ro tkyas abyō reto to mabo ye.* Bo ro tkyas refo sioh fee. Tna mfo refo bokyas ajō reto mno anu nrok nwe jō tamo byoh k'anu a?

17 Raa mkbair reto masen mamō mo k'anu tna mkyas bo matak.† Ana wetō mkyas bo re kbe anu kro ana. Menohe ana mkyas bo mkah bonaut rana ro mkair. Ana mawe mno re kbe anu twat nsya jō, re kbe anu nsen nmo nkro ati rana. Nri bokyas rana ma.

18 Mfi bo raa matak mkyas bo ro moof, tna

* **4:16** Raa ro Galatia mari Watum ro Musa sai ruman. Mnaut mawe mno bo weto to, kbe misoh iranya rana msya Allah. Paulus hafrah bo ro ana mno reto. † **4:17** Nmat Galatia 2:4. Raa mkbair reto mbis raa ro Galatia mawe, "Raa ro kro *Kristus* to, hawe sai ana kbe mari Watum ro Musa msya bo mafa raa ro Yahudi to ye. Feto to soh anu nwe nisoh iranya ranu nsya Allah to, hawe sai nbo nno bo weto beta!" Menohe bo ro *guru* weto mkyas to bokyas ro sre meto.

anu nri bokyas rana to, jō ksoh. Wore thau tsya anu ye tna wore jō tarak ye to, jō ksoh tawe anu nmur-mur nri tna nno bo ro moof yoyo.

¹⁹ Taja, tme, tao, tano na; anu to nfi ku wojō ro jō ksoh. Tiwya tama tkyas Yesus yasom k'anu to, tetsu mham-ham mfi fnya ro kborham tna mabe. Anu smot Yesus tna nsam wai k'Ait oh, menohe bosmot ranu matak fefares. Feto to jō tnaut yyi tna tari kborham u. Tawe fooh re bosmot ranu matak. Fooh re anu nrok nhaf sau su nsya *Kristus* yhaf rAit.

²⁰ Tna ksoh tawe tama thau tsya anu u, tna re tkyas bo kait tsya anu. Jō hawe bo bhah anu. Jō ksoh tawe tkyas bo rere tsya anu tna tisoh betrot bo wanu ro nno. Menohe thau fari ntefo tna kbe tno bawya u k'anu?

Anu nnan ku ro tiwya Sara mabe

²¹ Ayoh ee! Watum ro Musa anu nhar oh. Menohe maja rau to, anu nhar kaket fefares. Anu kro Watum ro Musa reto re kbe meen anu nkai riof a? Ebokfi mabo fee!

²² Bokom ro Allah mawe, "Tiwya Abraham yabe ku sme wait mabo trion ewok: Sait ybam Hagar ro mammo sryan boh, tna sait ybam yfain fai Sara ro mammo sryan ye fee."

²³ Ku ro Abraham wait mabo ewok to: Ait ro mbam Hagar to bo ro msai fee. Hagar mhaf reto mfi bo ja raa mno sai feto. Menohe ati ro Sara mhaf ku Ishak to, fai au mabi oh. Tiwya Allah ysi bosi k'Abraham to oh mi ait ysya Sara mtai matak mabe ku rau. Fai au mabe ku mam wore au mabi oh to, bo ro msai meto.

²⁴⁻²⁵ Fnya mabo ewok reto fret bo mawe bosi trion ewok. Hagar fret bo mawe Watum ro Musa. Allah yoo Watum reto yee k'Musa mam atu ro Sinai, ro mhau mam oo ro Arab. Tna Watum reto make raa taro fares. Ana weto to mammo sryan mfi Hagar. Tna mfo refo raa ro mhau mam *kota* ro Yerusalem to, ja Watum ro Musa mbo ana to, make ana matak fares ye.

²⁶ Tna bofret ro ewok to: Raa mkyas mawe Sara mnan anya '*kota* Yerusalem ro mhau mam uu'. Au oh mi wore Allah yamo *Raja* ybo raa wAit to. Anu fo bnan ku ro Sara mabe. Sara mammo sryan fee tna anu bros kar ye: Watum ro Musa make anu u fee.

²⁷ Bokom ro Allah mawe,
 "Fnya ro sfot to‡ kbe ana mabe ku mawat. Tna fnya ro msya raa wana mhau su to§ kbe mabe ku kebet sai. Tibyo: Fnya ro raa wana sikba ana makus tna ja mabe ku aro fee: Simaut oh! Fnya ro wase bo kborham to: Yok-yok tna sikoyõ oh!"

Yesaya 54:1

²⁸ Taja, tme, tao, tano na; tiwya Allah ysi bosi yawe kbe Abraham yabe ku. Tna yabe Ishak. Tna anu fo bnan Ishak: Bosi reto mno re anu bmo ku ro Allah wAit.

²⁹ Tiwya Hagar msya Abraham mabe ku Ismael mbam ksoh rana sai. Tna fo Har ro *Tuhan* mno re Abraham yabe ku Ishak. Ku Ismael yabi tna yno bo samyoh mai k'Ishak. Tna mfo refo to, mnan anya ye: Anu to bfi Ishak. Anu bmo ku ro Allah wAit mkah Har rAit ye. Tna raa ro kro

‡ 4:27 mnan fi Sara § 4:27 mnan fi Hagar

Watum ro Musa fares to ja mno bo samyoh mai k'anu.

³⁰ Menohe □tii Allah ybis Abraham yawe yikyak Hagar. □ Bokom ro Allah mawe,

“Nikyak sryan boh reto masen msya ku rau to mamu. Meen ku rau retait yasen yoo bouum anyõ aro fee. Ku ro yros kar, ybam fai au ro mros kar, meen yesait aran fri bouum reto.”

Kejadian 21:9-10

³¹ Au oh meto: Anu fo ku ro sryan boh reto wau fee. Reto oh mi anu kro Watum ro Musa fee. Anu fo ku ro fai Sara. Anu bri tna smot Allah reto oh mi Ait meen yoo riof yee k'anu to.

5

Raa ro kro Kristus to rero tna mamu mo k'Allah

¹ *Kristus* skur anu re bo aro matak make anu u fee. *Kristus* yno afo re anu nros kar oh! Feto to nros ntak oh! Nno be raa make anu mkah Watum ro Musa soh mfe bo roto to ma! Raa ro mari Watum ro Musa to masom bo fanes mnan fi sryan boh.

² Raa mkbair reto mbis anu mawe, “Nko hawe sai raa mkom (*sunat*) anu afo re nisoh iranya wanu nsya Allah.” He mfe. Jõ fi Paulus, raabis ro Allah. Tna jõ tawe k'anu tawe, “Nri ana to ma! Mfi bo anu nno bo reto to, mafer bo ro *Kristus* mno to, aro fee k'anu! Mfi bo anu nno bo reto to, anu fo nfi raa ro smot *Kristus* fee.”

³ Nri a? Awya ro ynaut yawe, “Ro moof to, jõ raa mkom (*sunat*) afo re misoh iranya ajõ tsya Allah.” Ynaut sre meto. Awya ro yawe fetu to,

yako hawe sai, kbe yari tna kro Watum ro Musa weto sau-sau mnan si!

⁴ Anu taro tomer kro Watum ro Musa afo re Allah yawe anu raa ro mhaf moof ati: Bonaut ranu reto to sre. Anu weto ja niranya nsya *Kristus* u fee. Anu nitsre boatmof ro Allah oh meto!

⁵ Menohe Har ro rAit mhau mban anu. Anu smot *Kristus* tibyo nwof tna binaut oon wore meen anu bhau bhaf moof ati. Tibyo Allah yhaf mnan k'anu.

⁶ Anu bhaf msya bkit, srau sau su bsya *Kristus* Yesus. Anu bhar bwe anu raa mkom oo mkom fee bo to, bo ro ati meto fee. Ro ati to anu smot *Kristus* tibyo batmof raa anya kakat.

⁷ Tiwya tinyi anu nno bo ro moof: Anu nri tna smot bokyas ro ati reto nwe bo reto mabo oh. Menohe raa roto taro mama sioh wa anu. Feto tibyo anu beroh smot bokyas ro ati reto fee.

⁸ Awya ykyas bo k'anu tna yoo anu nhaf wanu re anu nri bokyas ro sre reto? Allah ro ytu anu to yno meto fee.

⁹ Bokyas ro raa mkbair reto to besruf anu beta a? "Ati ro raa maim *roti* to, kbe raa moo *ragi* kbet mno *tepfung* mo mrok mtar mase."*

¹⁰ Menohe *Tuhan* yno re bokyas reto kbe beswan anu fee. Awya ro yno anu nrok nantutu to, kbe Allah yoo safo reto kbe ymit k'ait.

¹¹ Taja, tme, tao, tano na; raa taro mawe, "Paulus ybis yawe raa mkom (*sunat*) raa re kbe misohiranya rana msya Allah meto." He jō tkyas bo reto fee. Mfi bo jō tkyas bo reto fares to,

* **5:9** 1 Korintus 5:6. Bofret refo mkyas mawe bokyas ro sre kbet sai kbe besruf raa makin saah.

maami raa ro Yahudi sikowah jō u fee. Jō tkyas tawe, “Ro ati to, raa smot bo ro Yesus tiwya yno mam ara warok. Iso reto aran oh mi misohiranya raa msya Allah.” Tna raa ro Yahudi to hawe mari bo ro jō tkyas reto. Tibyo ana sikowah jō.

¹² Ana mkbair reto mkyas bo sobu anu. Tna mbis mawe anu raa mkom (*sunat*). Ana mno re anu nantutu. Rau ro moof to, ana mamamo msot bo wana rof!

¹³ Taja, tme, tao, tano na; Allah ytu anu nmo no k’Ait. Tibyo bo aro make anu u fee. Menohe kaket anu re kbe nno iro to ma! Rau ro moof to, natmof raa anya. Tna nno bo moof k’raa anya kaket.

¹⁴ Au oh meto, bo ro Allah ysi beta, yawe anu bno to, maja weto beta to sau aran. Au oh mi: “Natmof raa anya kaket mfi bo ja anu natmof netsu wanu nesait ai.”

Imamat 19:18

¹⁵ Ntoh anya to ma! Santri anya to ma! Kaket anu, be kbe tis rau mti kair k’anu anya ai.

Kbe anu bhau fyi mefo?

¹⁶ Tawe k’anu tawe, “Soh anu nri Har ro *Tuhan* reto to, mno re kbe anu hawe bo nno bo ro asmamo to u.”

¹⁷ Bo ro anu raa nksoh bno to hayah. Tna bo ro Har ro *Tuhan* nksoh mawe anu bno to hayah ye. Mbewok santri anya. Menohe Har ro *Tuhan* matak re ja anu bno bo mkair ro anu bhaf mbis anu bno to fee.

¹⁸ Soh anu nri Har ro *Tuhan* kaket to, kbe Watum ro Musa matak aro ye mbis anu to fee.

¹⁹ Anu bhar bwe raa taro to mhaf wana mkair. Tna ana mari bo ro mhaf wana ro mkair weto to mbis ana. Tibyo ana mno iro mfi fefo: Ana taro maus-as bo. Taro srau oot-oot tibyo mno boasmamo, bo ro mti hrenaut.

²⁰ Taro smot bo ro tabam, tna taro mari mafot ro kabes re saso matak rana. Taro knait anya, taro mbait mamus anya, ana taro waa kbe raa safto bo ro ana mse, taro mbo kmo mam matem, taro ja saso masom rana, taro mno bo re raa mbrir-brar mam *jemaat* tna safto-safto ana.

²¹ Tna taro maam bo raa, ana taro bisir-basar, tna makyō bokyō mnin-nin yoyo bo. Tawe k'anu u tawe, "Raa ro ja mno bo mfi fefo to meen Allah yuumto bo k'ana fee. Ana meen mamohau mam sawro ro Allah yamo *Raja* ybo to fee ye."

²² Menohe raa ro mari bo k'Har ro *Tuhan* to, kbe ana weto mno bo moof mnan ara ro tufrok make moof. Make ro moof weto oh mefo: Ana matmof raa anya kakat, ana simaut mase yoyo mam mhaf, srau wana, mhaf mato wana to tnok, ana kanyin sai masom bo ro mai k'ana, mhaf ase, ja ana mno bo moof k'raa roto, tna bo ro ana mawe mno ja krim-krim mno tu oh.

²³ Ana mhaf sneh, tna ja mbo metsu wana kakat tibyo mno bo nyi-nan fee. Raa ro ja mno bo ro moof weto to watum aro mno wa ana fee.

²⁴ Raa ro *Kristus* Yesu ybo weto to, ana masom u fee. Boasmamo ro tiwya ana mno weto to, ana moo mbeak mam ara warok makus oh.

²⁵ Har ro *Tuhan* mno re anu brok baam. Feto to nma, anu bri bo ro Har mawe.

²⁶ Feto to saso nsom re kbe raa bibi anu to ma.

Ntoh anya to ma. Tna kmo anya to ma.

6

Anu nbet anya

¹ Taja, tme, tao, tano na; soh anu sait yno iro to, kbe anu baro nmo nmat ait. Anu baro ro ja nri bo k'Har ro *Tuhan* to nmo tna watum bo k'ait nno mkah nhaf ro sneh. Nwe, "Nhah ne nno bo ro moof." Tna kaket anu be kbe ana mno tibyo anu ntek ye.

² Tna nmat raa anya ro mkai bo ro samyoh to, nsen nmo nbet ana. Nsya ana tubat bo ro samyoh reto su. Nisoh ana mhaf wana re ana srau jin u fee. Anu nno fetu to anu kro watum ro *Kristus* oh meto.

³ Soh raa sait ro ati fee ynaut yawe, "Jõ fi raa ro ati!" Ait tait sioh-sah ait oh meto.

⁴ Menohe ait ro yawe bibi ait yesait ai to, rau ro moof to, ait ymat sas bo ro ja ait yno kaket to wia. Tna soh ykai mafer ro moof to, kbe ait simaut mam yhaf mato. Nmat sas bo ro raa roto mno to ma.

⁵ Rau ro moof to, raa sait yesait kaket ait ai sai. Tna siko yno bo moof mnan si bo ro Allah yerif k'ait.

⁶ Tna raa ro ja mkyas watum ro Allah k'anu to, kbe anu sait-sait noo bo nee k'ana riryõn.

⁷ Sioh anu nesait to ma: Allah ymat tna yhar bo ro anu sait yno-yno. Awya ro ynaut mam yhaf mato yawe, "Allah wase bo ro mkair ja jõ tno to." Raa retait sioh ait yesait ai oh meto! Fetu niwana Allah to ma! Jõ fret bo tawe, "Mfi bo raa

sait furere bobat makan rau mam armato rait to, kbe meen bobat weto to make. Tna tis rau to ait yaret bobat mnan anya mamyot makan tiwya ait furere to.”

⁸ Reto oh mi: Anu bhaf to mkair. Tna awya ro yari bo ro yhaf rait mbis, tibyo yno bo ro asmamo to, kbe ait safe mkak. Tna awya ro yari bo k’Har ro *Tuhan* ybo yno to, kbe meen ykai roon ro hame mbam Har reto ye.

⁹ Nma, anu beroh bno bo ro moof. Wore anu hrowyō to, bitsre ma. Tna meen tis rau to, anu bkai bo ro moof.

¹⁰ Wore wo moof refo. Feto to nma, anu bno bo moof k’raa beta: Tinyi rau to, kbe anu bno bo moof k’raa anya ro smot *Kristus*. Tna fo bno bo ro moof k’raa roto beta ye.

Paulus ykyas watum ro tis beta tna ymah meen

¹¹ Bokom ro tis refo fo, jō tkom mkah tatem ajō ai. Tkom mayir mase.

¹² Raa mkbair reto tomer mkuk anu re kro Watum ro Musa. Mno fetu afo re kbe raa wana ro *agama* Yahudi nksoh. Au oh mi ana mbis anu mawe raa mkom (*sunat*). Ana mhar he bo reto bo ro ati fee. Rau ro ati to, raa smot (*percaya*) bo ro Yesus tiwya yno mam ara warok. Bo ro yno reto misoh iranya raa msya Allah. Raa mkbair reto mhar bo reto menohe beroh mbis raa mawe ana raa mkom (*sunat*). Raa mkbair reto waa kbe raa ro Yahudi to kmo tna sikowah ana.

¹³ Ana ksoh mawe raa mari he anu raa mkom tna kro Watum ro Musa ye mnan si mkah bo ro ana mbis. Re kbe ana safuk mawe, “Raa ro mhau mam Galatia to mari tna kro amu oh.” Raa mkbair reto to, tiwya raa mkom (*sunat*) oh.

Menohe ana mesait, kro Watum ro Musa mnan si fee.

¹⁴ Jõ hawe bo safuk. Jõ hawe bo raa mmat jõ. Jõ ksoh re raa mmat bo ro *Tuhan* ajõ Yesus *Kristus* yno sai. Au oh mi ysan yetsu rAit mam ara warok. Watum aro msya bo ro tabam refo fo taro to, ja raa mnaut mawe bo ro ati. Menohe mfo refo jõ tnaut tawe bo weto to bo ro ati fee. Tna bo ro jõ tnaut tawe bo ro ati to, raa ro tabam refo to hawe bo weto ye.

¹⁵ Mfi bo anu raa mkom oo mkom fee bo to, bo ati fee. Rau ro ati to anu smot *Kristus* tibyo nmos wanu to mrok maam.

¹⁶ Jõ skabuk Allah re Ait yatmof awya-awa sai ro miwer bo maja ro jõ tawe refo fee. Tna jõ skabuk re Ait ysan riof rAit k'ana weto tna yno re ana mhau mhaf tnok ye. Ana oh mi raa ro Israel, raa ro Allah wAit.

¹⁷ Tna jõ hawe te santri bo wefo tsya anu u fee. Raa roto ro mamu byoh *k'Kristus* sikowah jõ mnan oh! Jõ fi raabis ro *Tuhan* rAit tibyo raa mai jõ mayir-ayar mawat k'jõ sai.

¹⁸ Taja, tme, tao, tano na; jõ skabuk *Tuhan* ranu Yesus *Kristus* re yatmof anu sait-sait. *Amin*: Mabo oh.

**Watum ro Tuhan Bosi ro Tna
Mai Brat: Watum ro Tuhan Bosi ro Tna (New
Testament+)**

copyright © 2005 Wycliffe Bible Translators, Inc.

Language: Mai Brat

Contributor: Wycliffe Bible Translators, Inc.

All rights reserved.

2025-04-26

PDF generated using Haiola and XeLaTeX on 25 Apr 2025 from source
files dated 26 Apr 2025

71146407-c883-5cc1-b1e8-017c229bf3fa